

陽明先生道學鈔

陽明先生年譜卷下

謹按、

嘉靖元年壬午先生五十一歲在越

正月疏辭封爵

先是先生平賊擒濠俱瓊先事爲謀假以便宜行事每疏捷必歸功本兵宰輔憾焉是故不欲先生入京反抑同事諸人將紀功冊改造刪削先生曰冊中所載可見之功耳若帳下士或詐爲兵檄以撓其進止

或僞書反間以離其腹心、或犯難走役而
填於溝壑、或以忠抱冤而構死獄中有將
士所不預知步領所未嘗歷幽魂所未及
泄者非冊中所能盡載也今於其可見之
功宜_前舊_楊慎_宜調_成死_滇西_矣此揚新都
又裁削之何以願效忠赴義之士耶乃
疏乞辭封爵謂殃莫大于叨天之功罪莫
大於掩人之善惡莫深于襲下之能辱莫
重於忘已之耻四者備而禍全臣之不敢
爵非以辭榮也避禍耳疏上不報

卓吾曰、兵部主其謀而擬

旨票

旨、則首內閣者實專其事、倘部議雖當、而閣擬參差、則雖本兵亦無如之何矣。故先生之功、閣部寔共成之、與晉溪公前後十五札、極其鄭重、而閣老不得以寸楮相謝、過矣。及是乃膝口說而欲咸之、以其輔頰舌、不亦勞乎。

二月、龍山公卒

是月十二日己丑海日翁年七十疾且革

適

朝廷推論征藩之功進封翁及竹軒槐里公俱爲新建伯是日部咨達至翁聞使者已在門促先生及諸弟出迎問已成禮然後瞑目而逝

七月再疏辭封爵

時御史程啓充給事毛玉倡議論劾以遏正學承輔宰意也陸澄時爲刑部主事上

疏爲六辨以折之。先生聞而止之曰：無難正謗，嘗聞昔人之教矣。况今何止於是。四方英傑以講學異同，議論紛紛，吾儕可勝辨邪？况其說本出於先儒之緒論，而吾儕之言驟異于昔，反若鑿空杜撰者，固宜其非唉而眩惑矣。

九月葬龍山公於石泉山

二年癸未先生五十二歲，在越

二月

南京策士以心學爲問、陰以鬪先生也、門人徐珊讀策問、嘆曰、吾安能昧吾知以倖時好不答而出、聞者難之、曰、尹彥明後一人也、同門歐陽德、王臣、魏良弼等、直發師旨不諱、亦在取列、德洪下第歸見先生、先生喜曰、聖學從茲大明矣、德洪曰、時事如此、何見大明、先生曰、吾學惡得遍語天下、上今會試錄雖窮鄉深谷無不動矣、吾學旣非天下必有起而求真是者。

十一月、至蕭山

見素林公、自都御史致政、歸道錢塘、渡江來訪、先生趨迎於蕭山、宿浮峰寺、公相對感慨時事、慰從行諸友、及時敏學

三年甲申、先生五十三歲、在越

海寧董澐號蘿石以能詩聞江湖年六十八遊會稽以杖肩其飄笠詩卷來訪長揖上坐先生異而禮敬之與之語連日夜澐有悟因納拜日從先生徜徉山水忻然忘

歸其鄉子弟社友皆招之曰何乃老而自苦如此澐曰去吾將從吾之所好遂號曰從吾道人而先生爲之記

八月宴門人于天泉橋

是時大禮議起霍凡厓席元山黃宗賢黃宗明先後以大禮問先生皆不答

十月門人南大吉續刻傳習錄于越增前虔州薛侃三卷爲五卷矣

四年乙酉先生五十四歲在越

正月夫人諸氏卒

六月禮部尚書席書薦先生

先生服闋例應起復、御史石金等交章論
薦、皆不報。尚書席書爲疏特薦先生曰生
在臣前者見一人曰楊一清生在臣後者
見一人曰王守仁且使親領詰券趨

闕謝

恩、於是楊一清入閣辦事、明年有領券謝
恩之召、尋不果

年譜 卷五
九月歸姚省墓

有答顧東橋璣書其末繼以拔本塞源論極可讀

十月立陽明書院于越城

門人輩爲之也在城西郭門內光相橋之東

五年丙戌先生五十五歲在越

四月復南大吉書

大吉入觀見黜致書先生千數百言勤勤

懇懇略無一字及于得喪榮辱。先生嘆曰：此非真有朝聞夕死之志者，未易以涉斯境也。

八月答聶豹書

是年夏，豹以御史巡按福建，渡錢塘來見先生，別後致書謂思孟周程，無意於千載之下，與其盡信于天下，不若真信於一人。按豹初見稱晚生，後六年出守蘇州，先生已違世四年矣。豹乃見錢德洪王畿曰：吾

學誠得先生開發，冀再見，稱贊不及矣。茲以二君爲證，具香案拜先生，遂稱門人。

十一月庚申，子正億生。

贊按諸氏方以乙酉正月卒而正億卽以
戌十一月十七日生，天之報施仁人其何
如哉？使諸氏不死，張氏不得字矣。時鄉先
輩有靜齋六有者，皆踰九十，聞先生得子，
以詩爲賀，故先生次韻謝答，有曰：何物敢
云繩祖武，他年只好共爺長。正億初名正

聰後七年壬辰外舅黃綰因時相諱乃更
今名

十二月作惜陰說

劉邦采合安福同志爲會名曰惜陰請先
生書會籍故爲之說

六年丁亥先生五十六歲在越

四月鄒守益刻文錄於廣德州

五月命兼都察院左都御史征思田

六月辭疏不允時

朝議用侍郎張璁薦特起先生總督兩廣及

江西湖廣軍務先生聞

命上疏言臣患痰疾又思思田之役起於土官
讐殺比之寇賊攻劫郡縣荼毒生靈勢尚
差緩若處置得宜事亦可集臣謂今日之
事宜專責鑑等隆其委任重其威權略其
小過假以歲月至於終無底績然後別選
才能兼諳民情土俗如尚書胡世寧李承
勛者往代其任疏入詔鑑致仕遣使敦促

上道

八月

先生將入廣爲客坐私囑以戒子弟并以告夫士友之辱臨于斯者

九月壬午發越中

是月初八日德洪與畿訪張元冲舟中因論學問宗旨畿曰先生說知善知惡是良知爲善去惡是格物此恐未是究竟語德洪曰何如畿曰心體既是無善無惡意亦

是無善無惡知亦是無善無惡物亦是無善無惡若說意有善有惡畢竟心亦未是無善無惡德洪曰心體原來無善無惡若見得本體如此就說無功夫可用恐只是見耳畿曰先生明日起程晚可同進請教是日夜分客始散洪與畿侯立庭下先生使移席天泉橋上德洪卽舉所辨先生喜曰正要二君有此我今將行朋友中更無有論及此者德洪請問先生曰只是你自

有良知本體原來無有本體畿請問先生
曰汝中見得有此只好默默自修不可執
以接人上根之人世亦難遇一悟本體卽
見功夫物我内外一齊盡透此顏子明道
不敢承當豈可輕易接人乎

甲申渡錢塘

過釣臺有詩曰憶昔過釣臺馳驅正軍旅
十年今始來復以兵戈起空山烟霧深往
迹如夢裡微雨林徑滑肺病雙足胝仰瞻

臺上雲俯灌、臺下水人生。何碌碌、高尚乃如此跋。曰右正德己卯獻俘行在過釣臺。臺弗及登。今茲復來。又以兵革之役兼肺病足瘡。徒顧瞻悵望。書此付桐廬尹沈元。材刻置亭壁。

丙申至衢州

有寄德洪汝中詩二首

幾度西安道。江聲暮雨時。機關鷗鳥破踪跡。水雲疑伐鉞。非吾事。傳經愧爾師。天真

泉石秀新有鹿門期時德洪汝中方卜築
書院盛稱天真之奇并寄及之

不踏天真路依稀二十年石門深竹徑蒼
峽瀉雲泉泮壁環胥海龜嶠見宋田文明
原有象卜築豈無緣今祠有仰止祠環海
樓太極雲泉瀉雲諸亭

十月至南昌

先生發舟廣信沿途諸生請見徐樾自貴
溪追至餘干先生令登舟樾方自白鹿洞

打坐有禪定意先生令舉似曰不是已而
稍變前語又曰不是已而更端先生曰近
之樾領謝而別明日講大學于明倫堂唐
堯臣獻茶得上堂趨侍初堯臣不信學及
聞講沛然同門唉曰逋逃主亦投降乎堯
臣曰須得如此大捕人方能降我爾輩安
能

至吉安大會士友螺川

臨別囑曰工夫只是簡易真切愈真切愈

簡易愈簡易愈真切

十一月至肇慶

寄書德洪與畿是月

二十日乙未至梧州上謝

恩疏奏下尚書王時中持之得

旨守仁才畧素優所議必自有見事難遙度
俟其會議熟處宜亟行者聽其便宜

初總督命下具疏辭免及預言處分思田
機宜凡當路相知皆寓書致意有與楊少

師書求備員散局如太常國子之類其與黃綰書曰往年江西赴義將士功久未上人無所勸再出何面目見之且東南小醜特瘡疥之疾只爲從前張皇太過後難收拾今必得如奏中所請庶圖久安否則反覆未可知也其

與方獻夫書曰思田之事已壞欲以無事處之要已不能只求減省一分則地方亦可減省一分勞擾此議深知大拂喜事者

之心然欲殺數千無罪之人以求成一將之功仁者之所不忍也

十二月命暫兼理巡撫兩廣疏謝不允
七年戊子先生五十七歲在梧州

二月思田平

先生疏畧曰思田之役兵連禍結兩省荼毒已踰二年因詳十惡十善二幸四毀反覆極言且曰臣至南寧乃下令盡撤調集防守之兵數日之間解散而歸者數萬惟

湖兵數千道阻且遠不易卽歸仍使分留
賓寧解甲休養待間而發初蘇受等聞臣
奉命處勘始知

朝廷無必殺之意日夜懸皇惟恐臣至之不
速已而聞太監總兵相繼召還至是又見
守兵盡撤其投生之念益堅乃遣其頭目
黃富等先赴軍門訴告願得歸境投生惟
乞宥免一死臣等諭以

朝廷之意因復露布

朝廷威德使各持歸省諭。尅期聽降。蘇受等得牌皆羅拜。踴躍歡聲雷動。率衆掃境歸命。南寧城下蘇受等囚首自縛。與其頭目數百人赴軍門請命。臣等諭以

朝廷旣赦爾等。豈復虧失信義。但爾等擁衆負固。騷動一方。上煩

九重之慮。下疲三省之民。若不示罰。何以泄軍民之憤。於是下蘇受于軍門。各杖一百。乃解其縛。諭以今日宥爾一死者。

朝廷天地好生之仁。必杖爾示罰者。我等人臣執法之義。于是衆皆叩首悅服。臣亦隨至其營撫定其衆。遂委布政使林富前副總兵張佑督令復業。疏入。

勅遣行人獎賞銀五十兩。紵絲四襲。所司備辦羊酒。其餘各給賞有差。

先生爲文勒石曰。嘉靖丙戌夏。官兵伐田。隨與恩之人相比相煽。集軍四省。洶洶連年。于是之時。

皇帝憂念元元容有無辜而死者乎。迺今新建
伯王守仁易往視師。其以德綏。勿以兵虞。
班師撤旅。信義大宣。諸夷感慕。旬日之間。
自縛來歸者一萬七千。悉放之還農。而省
之安。昔有苗徂征。七旬來格。今未期月而
蠻夷率服。綏之斯來。速於郵傳。舞干之化。
何以加焉。爰告思田母忘帝德。爰勒山石。
昭此赫赫文武聖神。率土之濱。凡有血氣。
莫不尊親。

卓吾子曰。此碑石若出他人手。則字字皆
金石矣。惜哉先生自爲之耳。勞而伐功而
德。非九三君子之終也。中間干羽事雖不
妨比擬。但世人眼目小。世人如小兒成群。
見一巨人大吼其旁。卽飛鬼喪魄哭欲死。
先生寧不知邪。事只管做絕口不言。功劳
乃是經倫千古好手。且姚鏕是先生同鄉。
旣代其任而爲之。莫說他罷事。亦罷了。

四月議遷都臺于田州

五月撫新民

六月興南寧學校

七月襲八寨斷篠峽破之

八寨斷篠峽諸賊數萬南通交趾諸夷西接雲貴諸蠻東北與牛腸仙臺花相風門佛子及柳慶府汀古田諸猺廻旋連絡延袤二千餘里流劫出沒爲害歲久比因有事思田勢不暇及至是先生以思田旣平蘇受新附乃因湖廣保靖歸師之便令布

政使林富副總兵張佑等出其不意分道征之一月之內斬獲三千有奇先生見諸賊巢穴既已掃蕩而我兵疾疫遂班師奏捷乃

疏請經畧思田并斷篠峽八寨

一思田經畧事宜有三

特設流官知府以制土官之勢仍立土官知府以順土夷之情分設土官巡檢以散各夷之黨遂擬府名爲田寧以應識譜而

定人心設州治於府之西北立猛第三爲吏目待其有功漸陞爲知州分設思恩土巡檢司十有八以蘇受并土目之爲衆所服者世守之

一八寨斷篳峽經略事宜有六

移南丹衛城於八寨改築恩恩府治于荒田改鳳化縣治於三里增設隆安縣治置流官於恩龍以屬田寧增築守鎮城堡于五屯事下本兵持之戶部復請覆勘故學

不文志

不文志

士霍韜等上疏極言之耳

九月疏謝獎勵賞賚

以思田功也本月八日行人馮恩齋捧至

鎮

十月疏請告

謁

伏波將軍廟方先生十五歲時嘗夢謁見伏
波至是拜祠下宛如其夢因識二詩焉又

祀

增城新廟所謂五世祖死苗難諱綱者廟祀
增城舊矣先生謁祠奉祭祀因過

甘泉先生之廬題詩壁間又題其居曰我聞
甘泉居近連菊坡麓十年勞夢思今來快
心目徘徊欲移家山南尚堪屋渴飲甘泉
泉饑食菊坡菊行看羅浮雲此心聊復足
十一月丁卯先生卒於南安

是月二十五日先生踰梅嶺至南安本府
推官周積來見積及門者也見先生咳喘

不已便問無恙。先生曰病亟矣。二十八日晚泊問何地。曰青龍舖。明日召積入。開目視曰吾去矣。有頃遂瞑目而逝。蓋二十九日辰時也。卓吾子曰予親筆到此猶淚下不能揮而彼當不啻口出者反擠排不遺力。何其妬賢嫉能若是也。彼桂氏無足言數稱相知如楊一清喬宇輩。反視若寇讐小人肝腸。至此卒難掩矣。吾以謂湛甘泉黃文庵霍渭涯林見素諸公可敬也。時贛

州兵備張思聰迎入南塹驛就中堂沐浴。
如禮余歛布政王大用先備美材躋舟以
故臨終得力十二月三日思聰劉邦采以
及門王大用以知已偕官屬師生設祭入
棺明日輿櫬登舟士民遠近遮道哭聲振
地至贛提督都御史迎祭道左士民沿途
擁哭如南安至南昌巡按儲良材提學趙
淵請改歲行率士民昕夕哭奠

八年己丑正月喪發南昌

是月連日逆風。舟不得行。趙淵以及門故。
親祝柩前曰。先生豈爲南昌士民留邪。越
中弟子來候日久矣。忽西風作。六月遂至
弋陽。錢德洪王畿將以廷試進京。聞訃。
遂迎喪上嚴瀨。偕正憲等會于弋陽。訃告
同門。咸來奔赴。

二月庚午。喪至越。

是時朝中有異議。爵廕贈謚諸典皆不行。
且又下詔禁僞學。故詹士黃綰疏曰。忠臣

事君義不苟同、君子立身道無阿比臣
爲都事今少保桂萼時爲舉人臣取其大
節與之久友相知二十餘年矣昨臣薦新
建伯王守仁萼與不合因不謂然小人因
而乘間構隙然臣終不以此廢萼平生也
夫臣所以深知守仁者以其功與其事也
功高而見忌學古而人不識此守仁所以
終不容于世矣守仁之大功有四其一宸
濠不軌內臣如魏彬等嬖倖如江彬錢寧

等文臣如陸完等皆爲之內應鎮守如畢
真如劉朗咸爲之外應若非守仁身任討
賊之事不顧赤族之慘倡義勤王伐謀制
勝則天下事未可知也今乃皆以爲伍文
定之功是輕發縱而重走狗豈有兵無成
筭濛可徒搏而擒乎其二大帽茶寮浰頭
桶岡諸賊寨執連四省兵積累歲而守仁
臨鎮旬日底定其三田州思恩構釁年年
事不得已乃起守仁以往卒能使盧王之

黨崩角來降。感泣受杖而坐平一方大難。其四則兩廣八寨之賊百六十年以來不敢問矣。守仁乃假永順歸兵盧王降卒襲而勦滅之。若不聞知卒之以死勤事而猶議其後不亦傷哉。其學之大則曰致良知。致知出於孔氏。而良知出於孟子。何可異也。曰親民卽百姓不親。而凡親賢樂利不能與民同其好惡者。亦非創爲之說也。曰知行合一。亦本先民之言。所謂知至至之。

知終終之只一事也是守仁之學乃孔門正學可終廢而不講乎今尊乃以此非守仁遂致

陛下失此良弼使守仁不獲致君爲堯舜故臣不敢以此爲夢是也夫以守仁之學如此其功又如此而賞典不及削罰有加廢棄崇之恩倡黨鋼之虐今守仁客死妻子孱弱家童載骨藁埋空山鬼神有靈當爲惻然而況於人乎況於聖人乎臣實不忍見

聖明之世有此事也假使守仁生於異世猶當
追崇而况今日且永順之衆盧王之徒素
慕威德今舉措如此恐失衆心關係夷情
甚非細故臣昔與守仁爲友幾二十年一
日憤寡過之不能聞守仁言忽有深省復
師事之是臣於守仁實非苟然相信如世
俗師友者也昔萼爲小人所讒臣爲之憤
旣而得白臣爲之喜非臣之私也今守仁
抱冤亦猶桂萼向之負屈也伏願

皇上擴一視之仁特勅所司優以卹典贈謚仍
與世襲并開學禁以昭

聖德若此事不明則萬與臣終不能忘故臣敢
爾直言所以補萬之過亦以盡臣之義也
疏入不報於是給事中周延抗疏論列謫

判官

十一月葬先生于洪溪

是月十一月發引門人會葬者一千有餘
麻衣衰履扶柩痛哭四方來觀者莫不交

涇洪溪去越城三十里入蘭亭五里先生所親擇也先是前溪入懷與左溪會衝齧右麓術者心嫌之有山翁夢神人緋袍玉帶立于溪上曰吾欲還溪故道明日雷雨大作溪泛忽從南岸明堂周濶數百丈遂定穴

十年辛卯五月門人黃弘綱會黃綰於金陵爲先生祔子王正億請婚

先是有忌嫉者行譖於朝革錫典世爵有

司默承風旨、媒孽其家、鄉之惡少、一時煽動、徹子正億時方四齡、與繼子正憲離仳竄逐、蕩析厥居、明年夏、大學士方獻夫署吏部、以刑部員外郎王臣爲浙江僉事、分巡浙東、經紀先生之家、於是奸黨稍阻、時黃綰、造陞南京禮部侍郎、弘綱徑往問之、綰曰、吾室雖遠、吾有弱息、願妻之情、關至戚庶好與處、然老母在家、必得命乃可、於是德洪王畿走台請命、而以王艮主行聘。

禮

十二年壬辰九月正億往金陵時

正億外侮稍息內釁漸萌深居家局同門居守者或經月不見面於是僉事王臣推官李逢輿王良薛僑管州等議送正億至金陵依舅氏以居後至

四十三年甲子少師徐階特撰先生像記

記曰嘉靖己亥予督學江西就士人家摹得先生燕居像二朝衣冠像一明年庚子

夏以燕居之一贈呂生此幅是也先生在正德間以都御史巡撫南贛督兵敗寢濠平定大亂拜南京兵部尚書封新建伯其後以論學爲世所忌竟奪爵予徃來吉贛間父老云濠之未叛也先生奉命按事福州乞歸省乘單舸下南昌至豐城聞變將走還幕府爲討賊計而吉安太府松月伍公議適合郡又有積穀可養士因留其地徵諸郡兵與濠戰湖中敗擒之其事皆有

日月可案覆而忌者謂先生始赴濠之約
後持兩端遁歸爲伍所強會濠攻安慶不克乘其沮喪僥倖成功夫人苟有約其敗
徵未見必不遁凡攻討之事勝則侯不勝
則族苟持兩端雖強之必不留

武皇帝之在御也政由嬖倖濠悉與結納至或
許爲內應方其崛起天下皆不敢意其遽
亡先生引兵西留其家吉安之公署聚薪
環之戒守者曰兵敗卽縱火毋爲賊辱鳴

呼此其功豈可謂倖成而其心事豈不皦然如日月哉忌者不與其功足矣又舉其心事誣之甚矣小人之不樂成人善也自古君子爲小人所誣者多矣要其終必自暴白乃余所深慨者今世士大夫高者談玄理其次爲柔愿下者直以貪黷奔競謀自利其身有一人焉出死力爲國家平定大亂而以忌厚誣之其孰不盡驅士類入於三者之途不止凡爲治不患無事功患

無賞罰議論者。賞罰所從出也。今天下漸以多事。庶幾得人焉。馳驅其間。而平時議論如此。雖在賢者。不待賞自勸。彼其激勵將來。亦太無具矣。此予所爲深慨也。濠之亂。孫許死于前。先生平於後。江西會城。孫許皆廟食。而先生未有祠。予督學之二年。始祀先生於後圃。未幾被召。因摹像以歸。將示同志者。而首以贈呂生。予嘗見人言。此像於先生極似。以今觀之。貌殊不武。然

獨以武功顯於此見儒者之作用矣

卓吾曰徐存齋公作記大有感慨不平之思以故得時行志將當日所盡奪者一槩給與雖謂存齋公封先生子孫世襲新建伯可也不啻口出徐公有焉而天之默佑陰隲特地生一賢師相爲先生累白中腸亦可知矣夫方宸濠之自謂賢王以禮交於士大夫也雖孔夫子必不能以遽絕而自招不測之禍則先生縱與之交亦豈得

不謂之有深意者，擁兵上游，獨晉溪公與先生知之耳。使宸濠早知其如此，卽七首發矣。誰爲之養威蓄銳以滅宸濠乎？當時諸公亦豈盡昧此著，特以忌功妬名，假藉之以爲詞也。是故不宜與辦。

隆慶元年丁卯五月始

詔贈新建侯謚文成。本年正月內詔病故大臣有應得恤典贈謚而未得者，許部院科道官議奏定奪。於是給事中御史皆疏上

原任新建伯兵部尚書兼都察院左都御
史王守仁道德功勳宜膺殊卹下吏禮二
部會議得王守仁具文武之全才闡聖賢
之絕學筮官郎署而抗疏以犯中璫甘受
炎荒之謫建臺江右而提兵以平巨逆親
收社稷之功偉節奇勳久已見擢於輿論
封盟錫典豈宜遽奪於身終疏上報可
制曰竭忠盡瘁固臣子職分之常崇德報功
實國家激勸之典矧通侯班爵崇亞上公

而節惠易名、榮逾華袞、事必待乎論定、恩
豈容以久虛爾故原任新建伯南京兵部
尚書兼都察院左都御史王守仁、維岳降
靈、自天佑命、爰從弱冠屹爲宇宙人豪、甫
拜省郎、獨奮乾坤正氣、身瀕危而志愈壯、
道處困而造彌深、紹堯孔之心傳、微言式
闡、倡周程之道術、來學攸宗、蘊蓄旣崇、猷
爲不著、遺艱投大、隨試皆宜、勘亂解分、無
施弗效、閩粵之箐巢盡掃、而擒縱如神、東

南之黎庶舉安而文武足憲爰及逆藩稱
亂尤資仗鉞淵謀旋凱奏功速于吳楚之
三月出奇決勝邁彼淮蔡之中宵是嘉社
稷之偉勲申盟帶礪之異數既復撫夷兩
廣旋至格苗七旬謗起功高賞移罰重爰
遵遺詔兼采公評續相國之生封時庸旌
伐追曲江之遺邱庶以酬勞茲特贈爲新
建侯謚文成錫之

詒命於戲鍾鼎勒銘嗣美東征之烈券綸昭錫

世登南國之功，永爲一代之宗臣。實耀千年之史冊，冥靈不昧。寵命其承，六月十七日遣行人司行人

賜造墳域，遣浙江布政司堂上正官與祭七壇。

二年戊辰六月，先生嗣子王正億襲伯爵。

先是元年三月內，給事中御史等官爲開讀事，上疏請復伯爵，吏部奉

旨移咨江西巡撫都御史，會同巡按御史查

覆征藩實跡時浙江巡撫都御史趙孔昭
并巡按御史奏應復爵屢相同於是吏部
奉

欽依仍會同各官議得本爵一聞逆濠之變
不以非其職守急還吉安倡義勤王未逾
旬朔而元兇授首立消東南尾大之憂不
動聲色而奸宄蕩平坐貽

宗社磐石之固較之開國佐命時雖不同擬
之靖遠咸寧其功尤偉委應補給

誥卷容其子孫承襲以彰與國咸休永世無窮之報議上

詔遵

先帝原封伯爵與世襲至三年五月浙江巡

按御史奏議爵廕吏部復請

欽依仍會同各官議得誠意伯劉基食祿七百石乃

太祖欽定靖遠伯王驥一千石新建伯王守仁一千石係累朝欽定多寡不同失封爵

之典論功有六曰開國曰靖難曰禦胡曰平蕃曰征蠻曰擒反而守臣死綏兵樞宣猷督撫勦寇咸不與焉蓋六功者關社稷之輕重係四方之安危自非茅土之封不足爲報至于死綏宣猷勦寇則皆一身一時之事錫以錦衣之廕則可槩欲剖符則未可也竊照新建伯王守仁乃正德十四年親捕反賊宸濠之功南昌南贛等府雖同邦域分土分民各有專責提募兵而

平隣賊不可不謂之倡義南康九江等處
首罹荼毒且進且攻人心搖動以藩府而
叛朝廷不可不謂之勁敵出其不意故俘
獻于旬月之間若稍懷遲疑則賊謀益審
將不知其所終攻其必救故績收乎萬全
之畧若少有隙虞則賊黨益繁自難保其
必濟膚功本自無前奇計可以垂後靖遠
咸寧姑置不論卽如寧夏安化之變比之
江南難易迥絕遊擊仇越于時得封咸寧

伯人以爲宜同一藩服捕反何獨于新建
伯而疑之乎所據南京各御史欲要改廢
錦衣衛于報功之典未盡激勸攸關難以
輕擬合無將王守仁男襲新建伯王正億
不必改議以后子孫仍照臣等先次會題
明旨許其世襲

詔從之准照舊世襲

卓吾子曰方讒構之間興則雖
肅皇入繼諸賢滿朝爵既錫而復奪門下如林

愛莫能助。迨公論既定，則一徐公首宵無及門者。爵既奪而復世，如指掌耳。雖先生仁心自然，恩澤淪洽，天必世世佑之。然徐公之賢亦安可掩也。觀徐公先生像記，可以見公。

年譜後錄

刑部主事陸澄辨忠讒以定國是疏
臣切見巡按江西監察御史程啓充戶科
給事中毛玉各論劾下憂新建伯王守仁

似若心迹未明，功罪未當考。此論既俱，一
二嫉賢妬功之徒必有和者矣。臣係守仁
門生知之最詳，究憤寔甚，故敢昧死一言。
謹按守仁學本誠明，才兼文武，抗言時事，
致忤逆璫，杖至幾死，謫居龍場，居夷處困，
動心忍性，獨契道真，荷蒙錄用，遷至巡撫。
其在南贛四征而福建湖廣廣東江西數
十年逋寇，一時掃平，因奉

勑勘處叛軍，道經豐城，天遂反風，不但賊不

能加害而倡義勤王。不旬日而寧藩擒滅矣。人但見其處變之從容。而不知其忠誠之激切。但見其功成之容易。而不知其謀畧之淵微。但見其遭非常之構陷。而禍莫能中。而不知其守身行已。絕無毫髮之可議。當時張銳錢寧輩。以不遂賣國之計。而恨之。張忠江彬輩。又以不遂冒功之私。而恨之。宸濠劉吉輩。又以不遂慕逆之計。而恨之。凡可以殺其身而赤其族者。誅求搜剔。

何所不至。使守仁初有交好之情，中有猶豫之意。後有貪冒之事，諸人其宵隱忍而不發，而故留之以待啓。充毛玉而後發乎？

皇上龍飛，褒慰殊恩形于

詔旨，天下方爾快睹。

朝廷之清明，今功罪既白，賞罰既定，不意乃復有此恠僻顛倒之論，欲以曖昧不明之言掩其昭揭不世之功，天理人心安在哉？論者之意，大槩有六：一、明宸濠私書有守

仁亦好之語。二謂守仁曾遣興元亨見宸濠。三謂守仁亦爲賀生辰而來。四謂守仁起兵出致仕都御史王懋中知府伍文定攀激。五謂守仁破城時縱兵焚掠殺人太多。六謂宸濠本無能爲。一知縣之力可擒。守仁之功不足多。而捷本所奏。粧點太過。臣竊究之。不過忌功之心耳。夫宸濠私書。守仁亦好之說。乃啓充得於湖口知縣章玄梅者。切思刑部節奉。

欽依原搜簿籍盡行燒燬今玄梅之書從何而來若出于宸濠之口尤爲不足信矣夫聖賢用心實非尋常可測使守仁欲圖宸濠而幾事不密則亦不過如孫燧許達之一死以報國而已何以能成後功而貽皇上今日之安乎假使守仁畧有交通之迹而卒以滅之其心事亦可以自白於天下後世矣况以其絕無可憑信者遂疑其心而舍其討賊之大功哉其遺異元亨者以元

亨素懷忠孝或可萬一啓其良心而寢其
邪謀也及元亨一見不合遂歸使言合志
投當留信宿何宸濠反逆之日而與元亨
反在數千里之外乎今元亨之冤魂旣伸
而守仁之心事不白天理人心安在也毛
玉謂守仁因賀生辰偶爾遇變然宸濠生
辰在十三而守仁以十五方抵豐城旣係
往賀又胡爲獨後期不至也其言守仁由
王懋中等攀激起義尤爲乖戾夫守仁近

豐城五里而聞變卽僞刻兩廣都御史楊
旦大兵將臨火牌於知縣顧泌接見之時
令人詐爲驛卒走遞守仁佯喜以爲大兵
旣至賊必易圖當令顧泌傳牌會城以恐
宸濠時有報稱賊兵千百追至急乘漁舟
得脫此時王懋中安在次日奔至蛇河遇
臨江府知府戴德孺而府城不足恃又奔
入新淦城度城亦不可居乃復奔至吉安
而吉安之倉庫實乃駐劄其地傳檄遠近

起調軍民一面榜募忠義之士令本府以書請鄉官王懋中等盟誓勤王此時若非提督軍門以便宜起調各處軍兵宵聽致仕鄉官遂集乎今乃顛倒其說謂守仁掩懋中之功天理人心安在也至於破城之時焚者宮中自焚官兵救焚者也殺人者知縣劉守緒以守仁號令閉門者生迎敵者死故殺迎敵百餘人耳夫合省之民在城內者各受濠銀二兩米一石爲之拒我

是卽賊也。殺賊何罪耶？向爲王宮，今爲賊巢。昔爲國寶，今爲賊贓。卽焚之掠之，亦又何罪？今舍大功，摘小過，是黨宸濠而欲爲逆賊報仇也。且宸濠執焰熏天，人皆望風逃遁。及守仁調兵四集，搗其巢而散其黨，羽翼俱盡。妻妾赴水，然後知縣王冕得而執之。今乃以爲一知縣可擒，甚無據也。果若所云，孫燧許達何爲被殺？三司衆官何爲被縛？楊銳張文錦何爲守城一月不

敢出戰必待省城破而賊自解圍耶。伍文定何以一敗而被殺者八百人。其餘諸將又何以戰之三日而後擒滅邪。至若奏捷之外。或作僞牌以疑賊心。或行反間以解賊黨。所不載者尤多。而謂以無爲有。可乎？

彼時宸濠首事。震撼兩京。守仁以一書生談。啖平之於旬日之內。功亦奇矣。使不即滅而貽

先帝親征之勞臣。不知賣國之徒計安出也。又

使不卽滅而

先帝崩臣又不知

聖駕之來能高枕無憂否也今建不世之功反遭不明之謗天理人心安在哉臣知守仁之心決非榮辱生死所能恐動但恐公論不昭而忠臣義士解體此萬世忠義之冤而國是之大不定者宜乎天變之疊見耳臣與守仁分係師生義同生死伏願

聖明乞降綸音慰安守仁仍戒飭言官勿爲異

論庶幾國是以定而亦消天變之一端也。
光祿寺少卿黃綰明軍功以勵忠勤疏

臣聞賞罰者人主御天下之操柄也得其
操柄死命可致天下可運之掌今乃不然
凡盡忠勤職者卽譏謗集黜辱隨至以
此操柄失御人皆以奸詰巧避爲賢孰肯
身任其事哉臣不能枚舉姑以

先朝末年

陛下初政一事論之如宸藩構逆

陛下身見之矣、腹心應援、布滿中外、鴻卿近倅、
賄賂交馳、賣國奸臣、待時發動、方鎮遠近、
莫之如何、惟南贛都御史王守仁、中途聞
變、指心籲天、誓不與賊俱生、乃遣優人齋
諜、假興天兵、約征方鎮、會戰、俾其邀獲牽
疑、賊謀以俟、四路設備、中執叛臣家屬、謬
托腹心、兵法有先勝而後求戰者、非此謂
邪、功成之後、瘡痍未復、

武皇帝南巡、危疑莫測、守仁益竭忠勤、僅獲身

免守仁爲忠可謂數貞竭盡者矣使時無
守仁竭力效死腹心暗助京師存亡未可
知也雖畢竟天命有在終必殲夷然曠日
持久士夫蒙辱蒼生荼毒可勝言哉今受
責地方者遇事不敢擔當不過告變待命
而已且守仁家在浙東與江右壤接一旦
長驅父兄宗黨有噍類乎守仁於此夫豈
不思固自分必死雖夷滅而不悔也守仁
之志可謂精貫白日矣向者南贛之人皆

以守仁兵威武畧奇變如神以是茶寮桶岡大冒淵頭諸寨均焚滅增縣置遷堅明約法遂爲治境汎右之民建立生祠歲時虔祝民心不忘又可見矣

皇上登極命取來京宴賞既又不果特陞南京兵部尚書乃因言者謂不當賞宴以致奢費耳夫

陛下太官之厨一餐之寢所費凡何猶勞論列乎北京豈無一職必欲置之南京此皆邪

比蔽賢嫉功之所爲也。守仁後丁父憂，歸遂不起用。及時造言排諭，雖蒙拜爵、鉄券未給、祿米未頒。

朝事無與跡比樵漁縱使有過何庸論及而况但見其功不見其過哉其用意尤可知矣。不獨守仁，凡共勤王大小臣工亦廢黜殆盡。姑舉一二言之：彼時領兵知府惟伍文定得陞副都御史，廕一子千戶；邢郁徐璉陞布政郎令閒住矣。彼亦何過？縱使有

過八議惡在戴德孺雖陞布政旋死于水
皆無廢子副使陳槐因勸宰臣觸怒獨黜
爲民御史伍希儒謝源輒以考察去官夫
陳槐邢郁等皆抱用世之才秉捐軀之義
因功廢黜深可太息使他日無事則已萬
一有事而復責以捐軀效死難矣况乎守
仁學本性命才優經濟以

陛下首出之資若與之浹洽講明天下之治生
民之治可勝言哉前尚書席書吳廷舉今

侍郎張璁咸薦于朝曾蒙

簡命用爲兩廣總制臣謂總制寄止一方何

若用之

廟堂贊襄密勿轉移人心所濟天下矣伏惟
陛下念明良遭遇之難早召守仁令與大學士
楊一清等共圖至治別委賢才以爲兩廣
總制仍

勅該部給與守仁應得鐵券祿米將陳槐邢
珣徐璉等起用伍希儒謝源等查酌軍功

事例議錄戴德孺量與襲廕此實

陛下今日奉

天所操大柄不可移奪者宜早收之以爲使人
宣忠効力之勸

霍韜地方疏

臣見巡撫兩廣新建伯王守仁已將田州
思恩撫處停當隨復勦平八寨及斷藤峽
等賊臣等皆廣東人備知各賊爲害實跡
嘗竊切齒蹙額而歎曰兩廣良民何其不

幸生隣惡境未知何日底寧也又竊計曰
兩廣地方何日得一好官勦平各巢使良
民得安而頑民染惡未深者亦得格心向
化也乃幸恭遇

聖明特起守仁撫勦田州思恩地方臣等竊喜
聖天子知人之澤兩廣地方自是有底寧之期
矣是役也臣等又爲守仁計曰前巡撫動
調三省兵若干萬梧州三府積年儲蓄軍
餉用費不知若干萬復從廣東布政司支

去庫銀若干萬米若干萬殺死疫死狼兵
鄉兵民壯打手又不知若干萬僅得田州
安靖五十日耳自是而恩恩叛矣吊巖賊
出圍肇慶府殺數千家矣此賊併時同出
貴與田州思恩東西相應和若守仁者乘
此大敗殘破之後仰承

聖明拔灌之恩雖合四省兵力再支庫銀百餘
萬米數百萬餘勦平田州報功數萬級人
亦必且曰是天下之大功也而守仁乃不

役一卒不費半糧只宣揚

陛下聖德遂致恩惠兩府頑民稽首來服

雖舜格有苗何以過此臣等是以歎服王
守仁不惟能肅將

大威且實能誕敷

天德也若八寨之賊斷篴峽之賊又非田州恩可比天下十三省多平壤惟廣西獨在萬山之叢其山險其水迅故諺語曰廣西民三而賊七由山高土惡氣習兇頑雖良

民至者亦化爲賊也八寨賊則洪武以來所不能平若斷篠峽則自成化八年都御史韓雍僅一討平之耳今五十餘年遺孽復熾故廣西若柳州慶遠鬱林府江諸賊雖時出刦掠亦屢請征討若八寨則自國初至今未有敢議征討者四方頑民犯罪脫逃投入八寨則有司不敢追攝矣隣近流賊避兵追勦投入八寨則官兵不敢誰何矣是八寨實四方寇賊淵藪而斷篠峽

又入寨羽翼八寨不平則兩廣無安枕期也今守仁沉機不露掩賊不備一掃而清之如拂塵然臣等是以歎服王守仁能體陛下之仁以綏懷田州思恩向化之民又能體陛下之義以討服八寨斷藤峽梗化之賊謹按王守仁之成功有八善焉乘湖廣歸師之便兵不調而自集一也因田州思恩效命之衆兵雖勞而不怨二也所誅真積年巨盜非往日報功濫殺者比三也因勢利導

省糧運之費四也、不役民兵、不募民馬一舉而成、民不知擾五也、極惡者先誅、其細小巢穴皆願去賊從良、得勦撫之宜六也、八寨既平、則西而柳慶、東而羅旁、綠水新寧思平之賊合數千里、皆可漸次撫勦、兩廣良民得安生業、紓

聖明南顧之憂七也、韓雍雖平斷篠峽、而不知經畫其地爲久遠之圖、以故賊復熾盛若八寨、則百六十年所不能誅之寇、守仁既

一旦掃平卽徙建城邑以鎮定之誅惡綏良長治久安八也然則守仁于建置城邑之役蓋計之甚熟錢糧夫役又不待仰足戶部而後有處其以一肩分

聖明南顧之憂亦真可謂之賢矣不以爲功反以爲過是誠何心也先是正德十四年宸濠謀反江西兩司俛首從賊惟守仁同御史伍希儒謝源誓心竭忠不幸奸臣張忠許泰等欲掩守仁之功以爲已有乃揚言

曰、王守仁初與賊同謀、及見公論難掩、乃
又揚言曰、宸濠金帛俱王守仁、伍希儒、謝
源、滿載以去、當時大學士楊廷和、尚書喬
宇、亦忌守仁之功、遂不與辨白、而黜伍希
儒、謝源、俾落仕籍、王守仁不辨之謗、至今
未雪、可謂黜啞之冤矣、甚矣小人忌功、足以
誤國也、臣等是以歎曰、王守仁等江西
之功不白、無以勸勵忠之臣、若廣西之功
不白、又無以勸策勤之臣、是皆天下地方

大慮也。王守仁大臣也，豈以功賞有無爲輕重哉。第恐當時有功之人，及土官立功人等，視此解體，則在外撫臣，遂無所激勸，以爲建功之地耳。臣等廣人也，目擊八寨之賊，親聞守仁之功，今兵部功賞未見施行，戶部覆題，又欲再勘，臣恐城堡不得修築，逋賊復據巢穴，地方不勝可慮也。是故冒昧進言，惟願

聖明乞早裁斷，俾官僚早有激勸，城寨早得修

築逋賊早得招安良民早得復業嶺海之外歌味太平祝頌

聖德實臣等所以報

陛下知遇之大端也亦臣等自爲地方大慮也非得已也

錢王諸及門等搜錄

先生征濠反間遺事

龍光云是年六月十五日至豐城聞變時參謀雷濟蕭禹皆侍因濠進兵將及乃潛

入小漁舟與濟等同載得脫其假僞兩廣
軍門火牌云提督兩廣軍務都御史楊爲
機密重事准兵部咨及都察院右副都御
史顏咨俱爲前事本院帶領狼達官兵四
十八萬齊往江西公幹約於五月初三日
在廣州府起馬前進仰沿途軍衛有司等
衙門卽便照數預備糧草伺候官兵到日
支應若臨期缺乏悞事定行照依軍法斬
首等因意示

朝廷先差顏等勘事已密於兩廣各處起調
兵馬潛取宸濠使之恐懼遲疑不敢輕進
使濟等密遣垂覺人役持火牌設法打入
省城又與濟等謀爲迎接京軍文書云提
督軍務都御史王爲機密重事准兵部
咨該本部題奉

聖旨許泰却永分領邊軍四萬從鳳陽等處陸
路徑撲南昌劉暉桂勇分領京邊官軍四
萬從徐州淮安等處水陸並進分襲南昌

王守仁領兵三萬、楊旦等領兵八萬、秦金等領兵六萬、各從信地分道並進、刻期夾攻南昌、務要遵照方畧、并心協謀、依期速進、無得彼先此後致悞事機、欽此等因咨到職除欽遵外、照得本職先因奉

勅前徃福建公幹、行至豐城地方、卒遇寧王之變、見已退住吉安府起兵、今准前因遵奉

勅旨候兩廣兵齊、依期前進外、看得兵部咨

到緣由係奉

朝廷機密勅旨皆是掩其不備先發制人之謀其時必以寧王之兵尚未舉動今寧王之兵已出約亦有二三十萬若此來官兵不知的實消息未免有悞事機以本職計之若寧王堅守南昌擁兵不出京邊官軍遠來天時地利兩皆不便一時恐亦難圖須是按兵徐行或分兵先守南都候寧王已離江西然後或遮其前或擊其後使之

首尾不救破之必矣今寧王主謀李士實
劉養正等各有書密寄本職其賊將凌十
一閔廿四亦皆密差心腹前來本職遞狀
皆要反戈立功報效可見寧王已是衆叛
親離之人其敗必不久矣今聞兩廣共起
兵四十八萬其先鋒八萬係遵

勅旨之數今聞已到贛州地方湖廣起兵二十
萬其先鋒六萬係遵

勅旨之數今聞已到黃州府地方本職起兵

十萬遵照

勅旨先領二萬屯吉安府地方各府知府等官各起兵快約亦不下一萬之數共計亦有十一二萬人馬儘已殲用但得寧王早離江西其中必有內變因而乘機夾攻爲力甚易爲此合用手本備開緣由前去頑請查照裁處併將一應進止機宜計議停當速差乖覺曉事人員與同差去人役星夜回報施行旣已寫成手本令濟等選差

慣能走遞家人，重與盤費，星夜前去。又令濟等尋訪素與宸濠交通之人，令其密去報知，差人四路跟捉，備細拷問。當時殺死宸濠，以是疑養正等不信其謀，又與龍光計議假寫回報李士實書云：承手教密示足見老先生精忠報國之本心，始知近日之事，迫于勢之不得已，但身雖陷于羅網，乃心罔不在王室也。所喻密謀非老先生斷不能及此。今又得子吉同心協力，當萬

萬無一失矣、然機事不密則害成、務須乘時待機而發乃可、不然恐無益於國而徒爲老先生與子吉之累、又區區心所不忍也、况今兵勢四路已合、只待此公一出、便可下手、但恐未肯遽出耳、昨凌閔諸將遣入密傳消息亦皆出于老先生與子吉、開導激發、但恐此三四人者、皆是粗漢、易有漏洩、須戒令慎密、又曲爲之防可也、目畢卽付丙丁、知名不具、與劉養正書同、乃遺

雷濟設法差遞李士實龍光設法差遞劉
養正各差遞人亦各被宸濠殺死濠由是
愈疑劉李劉李亦各自疑上下已離兵勢
日衰初時宸濠謀定六月十七日出兵自
於二十二日江西起馬徑趨南京謂凌卽
位直犯京師因聞前項反間疑阻遂不敢
出先遣兵出攻南康九江而自留省城賊
兵候久不出亦各退阻其後宸濠雖探知
四路無兵然師老氣衰亦多潛來投降我

師一候宸濠出城卽統兵而進龍光曰當時若不行間以疑宸濠宸濠必卽時擁兵而出正所謂迅雷不及掩耳兩京各路何時爲備所以破敗宸濠使之坐失事機全
是行間遲疑宸濠一着今人讀奏冊所報皆是可書之功不知書不能盡者固十倍於奏冊也又言寧藩事平京邊官軍南來無所搜求咸泄毒擣怒於吳元亨與濟禹光等元亨被執光等四竄逃匿家破人亡

當日光等粘貼告示標榜旗號木牌皆是
半夜昏黑衝風冒雨涉險破浪出入賊壘
萬死中得一生所遭行間人役被濠殺死
俱是親信家人各議者不究始末并將在
冊功次亦盡削去又言先生旣破會城忽
傳令造免死木牌數十萬及發兵逆擊宸
濠取木牌順流放下時賊衆已聞會城攻
破及見木牌爭取散去者不可計數二十
五日戰于鄱陽因風不便我兵少挫先生

卽令斬取先却者頭各兵殊死抵敵賊兵
始敗忽見一大牌大書寧王已擒諸軍毋
得縱殺一時驚擾遂大亂次日賊益窮
促宸濠泣辭官眷思欲潛遯見一漁舟隱
在蘆葦之中宸濠大聲呼渡漁人移舟接
濟竟送中軍諸將未知也雷濟曰昔在豐
城聞變南風正急拜天告曰天若憫惻百
萬民命幸假我一帆風頃之舟人謹謔濟
禹取香煙試之舟上果然已而北風大作

時濬追兵將及。先生呼一小漁船。自縛日
勅令濟禹持米二斗。醬肉五寸。與家眷逐別。
臨發。問濟曰。行備否。濟禹同對曰。已備。先
生笑曰。還少一物。濟禹思之。未得。先生令
取船頭羅蓋。曰。到地方。非此無以示信。及
至吉安城下。戒嚴。舟不得泊。濟禹揭羅蓋
城上。遂譙謂曰。王爺爺還矣。乃開門羅拜
迎入。或問先生用兵有術否。曰。用兵何術。
但能養得此心。不動。方術耳。凡勝負之決。

不待臨陣而卜，只在此心動與不動之間。
昔與濠逆戰，南風轉急，面命某某爲火攻之具。是時前軍正挫，某某對立，豐視三四申告耳。如弗聞，此輩皆有大名於時。平日智慮，豈有不足？臨急忙失如此，智術將安所施？鄒謙之云：昔鄱陽交戰時，先生與同志坐中軍談學，諜者走報前軍失利，先生出見諜者，退而就坐，談說如初，神色自若，頃之走報賊兵大潰，先生又出見諜者，退

而就坐談說如初，神色自若。錢德洪曰：洪事先生八年，同門有問及兵事者，皆不答，以故南贛寧藩始末，皆不與聞。先生沒後，搜錄遺書七年，而奏疏文移始集，及查對，明日而後五征始末具見，獨用間一事去。年主試廣東道經江右，訪問龍光始獲間書，間牌諸稿，并所聞於同門者。

甘泉撰

先生墓誌銘

故友新建伯陽明王先生之子正億以其
岳舅禮部尚書久菴黃公之狀及書來請
銘曰公知陽明者也非公莫能銘甘泉子
曰吾又何辭然而公亦知陽明者也非公
莫能狀公狀之吾銘之公狀其謠吾銘其
大吾又何辭乃發狀而謹按之讀世係狀
云云曰公出於龍山大宗伯公華推其遙
遙遠汎於晉高士羲之光祿大夫覽焉其
有所本之矣夫水土之積也厚其生物必

番有以也夫。讀誕生狀云云曰其異人矣。
陽明公殆神授與。讀學術狀云云曰初溺
於任俠。再溺於騎射。三溺於詞章。四溺於
神仙。而五溺於佛氏。正德丙寅始歸正于
聖賢之學。會甘泉子于京師。遂相與定交。
而講學焉。讀仕進狀云云曰初舉已未禮
闈第一。徐穆爭之。落第二。然益有聲。差督
造王威寧墳。獨受劍佩之贈。以與少時夢
協也。蓋兆之矣。疏邊務。陳時政闕失。有聲。

授刑部審囚淮甸有聲起補兵部上疏觸劉瑾廷杖不死謫貴州龍塲驛丞萬里矣然而公不少休也端居嘿坐而夷人自化又益有聲人或告曰陽明公至浙自沉于江至福建而始起故其登鼓山之詩曰海上會爲滄水使山中又拜武夷君益有徵也甘泉子聞而笑曰此佯狂避世者也爲作詩曰佯狂欲浮海說夢痴人前及後會于除陽彼誇虛孰有以爲神奇者烏足以

知公哉。復起尹廬陵。六月而百務具舉。有聲取入刑部。改吏部驗封。有聲因爲甘泉子曰。乃今可卜隣矣。遂就甘泉子長安灰廠右隣居之。而時講于大興隆寺。久庵黃公宗賢與焉。三人相謹洽。語意和平。久庵曰。他日天台鴈蕩。當爲二公作兩草亭。後二年。陽明公遷貳南太僕。聚徒講學。有聲。又明年。甘泉子丁憂。扶母柩而南。陽明公時轉南京鴻臚。出吊於龍江關。而公亦卽

轉爲南贛都憲矣。讀平贛之狀云云。甘泉子曰。雖有大司馬王晉溪知已。亦以陽明公素蓄銳士。以待不時之用。迅雷呼吸之間。人莫能測也。讀平江西之狀云云。甘泉子曰。先是余居憂致書于公。幸因閩行之便。以去。以公時有宰相之隙。後有江西未萌之禍。不去必爲楚人所鉞。而公兩不報。未幾寧府變作。公幾陷於虎口。而能倡義檄諸遠近。起兵會于豐城誓師分攻七門。

七門大開，遂除留守之黨，封府庫之財，收劫取之印，安脇從之民，釋被執之囚，表死難之忠，據省城絕其歸路，直趨樵舍，遂擒宸濠，是水也以淺見測，淵謀也。然始而翕然稱爲掀天揭地之功矣。既而大吏始知焉，內幸爭功者附焉，輾轉殫力竭精，僅乃得免，或未嘗不思前慮也。所以危而不死者，內臣張永護之也。於大吏門列，不亦愧乎。由是遂流爲先與後擒之言，上下騰沸，是

不足辨也。使陽明公而實許，劉養正則濠殺孫殺許必待陽明至乃發。陽明未至而發者，知絕意于陽明之與已矣。使陽明而許之，必乘風直抵南昌，必不與豐城聞顧佖告變，卽謀南奔以倡大義，奪漁舟使如漁人，然以奔吉安矣。其遣兵校追公者，非迎公也，將脇公也。且濠之上不能直趨中原以北，中不能攻陷金陵，以據都以陽明爲之制其後，兵威足以累之，使不前也。又

以據會城，絕其資重與歸路也。功莫大焉者也。若夫百年之後，忌妬者盡死，天理在人心者復明，則公論定矣。已而

賜勅錫勞，封新建伯，奉天征討，推誠宣力，守正文臣，特進光祿大夫柱國，兼南京兵部尚書，參贊機務，歲支祿米一千石。于是天其將定矣，而置之南者，有人焉以參乎其間矣。公丁父憂，四方從學者日衆，有迎忌者，意致有僞學之論者，人其勝天乎？或以浮

語阻公六年不召尋因論薦命爲兩廣總督或曰其且進且阻使公不得入輔乎讀恩田之狀云云曰公奏行勦之患十行撫之善十乃撤防解戰甲諭威信受來降杖王目復岑世設苗守而思田靖矣夫其不革岑猛之後以夷治夷之道也人知殺伐之爲功不知神武不殺者功之大也仁與義兩得之者也讀八寨之狀云云或曰八峒捲襲村落以爲功無破巢之功也辨者

曰陽明縱貪功當取岑氏盧蘇王受之大功不宜舍其大者取其小者其亦不知不武甚也夫宣慰諸哨之兵可襲則襲出其不意兵家之竒不可豫授者也而以病陽明焉將使爲宋襄爲陳儒之愚邪非馭戎不測之威矣事後而請告病亟矣不待報而遽行且行且候命其卒于南安途次而不及命下亦命也江西輔臣進帖譖公上革之恤典人衆之勝天也亦命也百年之後

天定將不勝人矣乎。甘泉子始詔入禮部面叩輔臣曰。外人皆云陽明之事乃公爲之。輔臣默然。公卒。兩廣江西之民相與哭於途。曰哲人其瘳矣。士夫之知者相與語於朝。曰忠良其逝矣。四方同志又且相與吊於家。曰斯文其喪矣。父庵公爲之狀六年而后就。慎重也。甘泉子曰。吾志其大義銘諸墓。將使觀厥詳于狀也。

文菴撰

先生行狀節畧

先生年十歲，有相者謂塾師曰：「此子他日官至極品，當立異等功名。」已未登進士第，與太原喬守、廣信汪俊比地，李夢陽、河南何景明、姑蘇徐禎卿、白下顧璘、山東邊貢諸名士以才能相馳騁，學古詩文。

公知廬陵入覲，予時爲后軍府都事，雖與公有通家之舊，實未知學，執友柴墟儲公耀與予書曰：「近日士夫如王公伯安、趨向

正造詣深足下肯出與之遊麗澤之益未必不多予因卽夕趨見公喜曰此學久絕子何所聞而遽至此予荅曰雖粗有志實未用功公曰人患無志不患無功卽問曾識原明否來日請會以訂我三人終身共學之盟明日公令邀予會湛甘泉於別館又數日甘泉與予相約告喬白岩乞轉懇楊邃菴冢宰留公于此楊乃擢公爲吏部驗封主事予三人者自是暇必會聚飲食

啓居必共務各相砥礪以成所學壬申冬
予告歸公爲文與詩送予并托予結茅天
台鴈蕩之間而共老焉甘泉亦欲買地蕭
山湘湖之間爲屋與余三人共之

巡撫南贛時屢請勅便宜行事衆皆笑以
爲迂惟本兵王公慨然曰

朝廷此等權柄不與此等人用又與誰用我
必與之

十四年公再疏乞歸當路忌公欲從其請

王公瓊逆知寧藩必反。一日召其屬主事應典曰：我寘王某於江西，與之便宜行事者，不但爲溪洞諸賊若有他變，非便宜行事，勅書旗牌何以施用？時福建有叛軍進貴等之變，公謂此小事本不宜煩王某，但假此牽掣便宜勅書在彼手中，以待他變耳，爾可爲我做一題稿來看。

公自吉安倡義，兩上疏告變，王公瓊楊言於朝曰：王某在南贛，必能擒賊，不久當有

捷報但

朝廷不命將出師則無以壯其軍威
公稱病淨慈寺張永太監在
上前備言公盡心爲國之忠勲及彬等欲加害
之故既而彬等果誣公欲反

上不信彬等又言苟不信試召之必不來
上遽召公公卽奔命至龍江關忠等又從中阻
之使不得見公乃綸巾野服入九華山待
命張永聞知又力言于

上曰王守仁實忠臣聞衆欲爭其功欲并棄其
官入山修道由是
上益信公

田州亂張公孚敬拉桂公萼同薦公總制
兩廣桂不得已勉從之予時爲光祿少卿
先疏論江西軍功及公才德堪任輔弼
上喜親書御劄并疏付內閣議楊一清忌公與
之同列乃與張孚敬具揭對曰王守仁才
可用但好服古衣冠談新學人頗以此異

之不宜入閣但可用爲兵部尚書桂知大怒詈予潛進揭帖毀公

上意遂止公亦遂扶病蒞任旣復恩田平八寨楊公與桂公謀曰守仁事完回京

上復命見如何且黃某與張羅峯又薦之若得見必留用無疑也於是又題命公兼理巡撫公復上疏乞骸骨就醫養病因薦林富自代以未離任便予交代也前曾薦致仕都御史伍文定與侍郎梁才代已矣又一

月公乃班師至大庾嶺謂布政王公大用曰爾知孔明所以付托姜維乎大用遂領兵擁護爲敦匠事公旣逝柩經南贛雖深山窮谷男婦老弱皆縗素匍匐哀迎行道之人無不流涕者計至桂欲因公乞養病疏參馭害公令該司匿不舉乃叅其擅離職役及處置恩八寨恩威倒置又詆江西軍功冒濫乞命多官會議先此張羅峯見公所處岑氏及蘇受得宜征勦八寨有

方極言稱嘆謂予知人又述在南京時與
言慙慙欲公之意曰我今日方知王公之
不可及卽薦於朝取來作輔共成天下之
治桂與楊聞之皆不樂乃嗾錦衣衛都指
揮聶能遷誣奏公用銀百萬托余送與張
某薦爲兩廣余疏辨其誣奉

正旨黃綰學行才識衆所共知王守仁功高望隆
輿論推重聶能遷這廝捏辭妄奏傷害正
類都察院便照前

旨嚴加究問務要追究與他代做奏辭并幫助奸惡人犯來說黃綰安心供職不必引嫌辭避下能遷于獄杖之死時予爲詹事桂楊計必欲害公惡予在

朝適有南缺卽推予補南京禮部侍郎明年

春

上將郊桂密具揭以進

上遂允削公世襲伯爵并常行卹典贈謚入至今以爲恨蓋當路忌之旣深而南北言臣

承望風旨，反肆譖劾。雖平日雅好公者，方公成公時，亦心害其能。公旣一言不發，雖及門，或一二真相信者，䟽辨其誣。公又極力止遏，深以爲不可。乃考察之年，邢珣、徐璉、陳槐、謝源等，一切被黜。則公雖欲不言，不得矣。汪鋐以予諱大同之征，當分別善惡，不當玉石俱焚。汪鋐迎合張公，劾予回護屬官，難居大臣之位。調予邊方叅政，賴聖明令復原職。鋐又論公僞學，指予黨邪不忠。

及所以許婚携撫者予又踰明公學術忠
正亦賴

聖明拔之省察某與守仁之無辜於乎公與
予平生所期何如也而今固止此也夫

李卓吾曰獲上信友原是一事久菴之信
友如此獲上如此吾以久菴先生可愛也

而

世廟知人之明亦安可誣乎方陽明先生之居
驗封也浙之宦遊京師者數載之間何啻

百十餘人、獨約、义菴與甘泉、三子爲同志、之會、結終身之盟、則陽明固已、物色之早矣、义菴雖欲不犯衆怒、以爲先生辨、又可得耶、與婚撫孤、忘身排難、陽明先生可以死矣、矧及門之士、聯屬四方、孜孜講學不懈、固以先生獨得洙泗之原、的爲中興之教主、亦以义菴之爲倡也、李贊小子、故復詳列書院人數、地方以附于先生年譜之後焉。

年譜後人

嘉靖九年庚寅門人薛侃建精舍於天真山祀

先生

天真距杭城之南十里山多奇巖古洞下瞰八卦田左抱西湖前臨胥海先生居越時嘗欲擇地當湖海之交使目前常見浩蕩及起征思田洪畿等相隨渡江偶登此山若與意會以告先生先生曰吾二十年

前曾遊此故至西安遺二詩有天真泉石
秀新有鹿門期之語侃奔師喪既終葬患
同志聚散無期億師臨別遺念遂築洞于
山麓董漸等董其事

十一年壬辰門人方獻夫合同志會于京師時
江西桂萼在

朝方嚴禁講學薛侃等已遭罪謫京師方諱
言學是年編修程文德歐陽德楊名在翰
林侍郎黃宗明在兵部戚賢魏良弼沈謐

等在六科與大學士方獻夫俱主會適黃
綰以進表入洪與畿以趨廷對入與林春
徐樾林大欽等四十餘人始定日會之期
十二年癸巳門人歐陽德合同志會于南畿

時遠方四集類萃群趨或會于城南諸刹
或會于國子鷄鳴倡和相稽疑辨相繹師
學復有繼興之機矣

十三年甲午門人鄒守益建復古書院於安福
祀先生

先生居越時劉邦采首創惜陰會于安福間月爲會五日先生爲作惜陰說既後守益等建復古連山復真諸書院爲四鄉會春秋兩季合五郡出青原山爲大會凡鄉大夫在郡邑者皆與焉於是四方同志相繼以起惜陰爲之倡也

本年三月門人李遂建講舍於衢麓祀先生先生起征思田時舟次西安門人樂惠等冒雨出候先生出天真二詩慰之明年喪

還玉山惠與王修等迎襯于草萍憑棺而哭者數百人聲聞十數里至西安諸生追師遺教罔知所寄洪興畿乃與定每歲會期是年遂知府事築室衢之麓設師位歲修祀事諸生柴惟道王之弼等又分爲龍游水南會徐用檢等爲蘭西會與天真遠近相應往來講會不輟衢麓爲之先也
本年五月貴州巡按王杏建王公祠于貴陽是年杏按貴陽聞里巷歌聲藹藹如越音

又見士民歲時咸走龍塲致奠亦有遙拜於其家者始知先生教化入人之深若此門人湯鳴等數十人請建祠以慰士民之懷乃爲贖白雲菴舊址立祠置田以供親事杏立石作碑其畧曰諸君之請立祠以追崇先生也立祠果足以追崇先生乎構堂以爲宅設位以爲依陳樽俎以爲享似矣未也夫尊其人在行其道想像于其外不若佩教於其身云云

十四年乙未直隸巡按曹煜建仰止祠于九華山祀先生

九華山在青陽縣先生兩遊九華宿化城寺寺僧好事者爭持紙索詩蓄墨跡甚富因思夙範刻像于石壁而亭其上煜因諸生請建祠于亭前而扁曰仰止

十五年丙申浙江巡按張景提學僉事徐階重修天真書舍立祀田

重修碑記係禮部尚書黃綰筆

十六年丁酉門人周汝員建新建伯祠于越
是歲汝員以御史按浙拓地建祠取南康
蔡世新肖像以祀

本年十一月僉事沈謐建書院于文湖祀先生
文湖在秀水縣北四十里廣環十里中積
一洲四面澄碧書院創焉謐初讀傳習錄
有省卽期執贊以先生往征思出及聞計
痛悼不已後爲行人聞薛子佩講學京師
歎曰先生雖沒傳其道者尚有人也遂以

師事薛率同志講學文湖書院置田若干以贍師生是年巡按周汝貞立師位於中堂春秋二仲月率師生虔祀事歌師詩以侑食後謚起僉憲江右遍復南贛諸祠謚沒參政孫宏軾副使劉慤設謚位附食於師謚子沈啓原增置贍田又議附薛子位于文湖祭期定季冬之日同志輿祭天真者同趨文湖于今益盛

十七年戊戌浙江巡按傅鳳翹建祠于龍山

龍山在餘姚縣治之右辛巳先生歸省袒
瑩講學于龍泉寺之中天閣親書三八會
期于壁丁亥出征思田每遺書必念及龍
山傳因請建祠閣之上方每年春秋二仲
月有司主行時祀

十八年己亥江西提學副使徐階建仰止祠于
洪都祀先生魏良弼立石紀事

吉安士民建報功祠于廬陵祀先生

先生宰廬陵七越月而入

觀至是聞計喪過河下百姓沿途哀號如悲親戚相與築祠歲修私祀名曰報功後曾孔化王時槐陳嘉謨等增築制益宏麗春秋二仲皆郡有司典司祀事矣

十九年庚子門人周桐應與等建書院于壽岩祀先生

壽岩在永康縣西北岩出瑞石空洞崆爽四山環翠五峯前擁桐典程文德共取岩作室以居來學立位中堂歲時奉祀

二十一年壬寅門人范引年建混元書院于青

田祀先生范子卒春秋配食

二十三年甲辰門人徐珊建虎溪精舍于辰州
祀先生

先生還自龍塲與龜元亨等會龍興寺只
道靜坐密室悟見心體是年珊爲辰州府
同請於當道大作祠宇置贍田鄒守益爲
作精舍記羅洪先爲作性道堂記

二十七年戊申萬安同志建雲興書院祀先生

書院在白雲山麓，前對芙蓉峯，模下秀出如圭，大江橫其下，兼民居井路，邑屋華麗。德洪曰：民庶且富矣！對曰：是城四十年前猶赤土也。蓋南贛洞賊流劫無常，妻兒相牽而泣曰：賊來曷避？惟一死可待耳。先生來而賊平，始築城，生聚以有今日。

九月，門人陳大倫建明經書院於韶祀先生，時大倫守韶，建書院立師位，與白沙陳先生並記。

二十九年庚戌吏部主事史際建嘉義書院于溧陽祀先生

四明門人呂懷等建大同樓於新泉精舍設師像合講會

精舍在南京崇禮街初史際師甘泉築室買田以爲同志請會之資是年復與李遂劉起宗陸光祖等建樓于精舍設先生并甘泉像焉

三十一年壬子南贛都御史張烜復王公祠于

鬻孤山僉事沈謐申復之也

祠在贛州鬻孤臺前濂溪祠後嘉靖初年軍衛官兵百姓人等思師不已百姓則建祠鬻孤臺軍衛官兵則建祠學宮之右塑像設祀俱有成式後有異議者移鬻孤祠像於報功祠後軍民懷憤至是署兵備僉事沈謐謁祠像泣然而涕具由軍門乃復修葺前祠迎師像于鬻孤張烜作記立石先生自征三浰平山寇之後贛屬邑俱立

社學城中立五社書院選生儒行義表俗者立爲教讀教之歌詩習禮于是市廛之民皆知服長衣父手揖讓歌誦之聲溢于委巷因異議出而成規盡壞五書院遂爲強梁竊據禮樂之教息矣謐詢訪得實罪逐僭據五社復完禮教復興漸漸乎如師在日矣

卓吾子曰祠之廢興烏足爲先生輕重哉特因是可以見人心之難泯耳沈謐未親

承教但讀其書便爾誠復何必皆七十子之徒耶生榮死哀吾謂陽明先生當之矣

沈謐復王公祠于南安

南安青龍浦先生屬纊地也士民哭泣建祠于學宮之右歲時奠祝後有司望風承指亦遂遷祠于委巷人心大不堪故謐具申軍門張卒復之烏乎張亦人傑也哉

三十二年癸丑謐又修建王公祠于信豐縣

按謐虔南公移錄曰贛州府所屬十一縣

俱有前都察院右副都御史陽明王公祠
嵬然並存蓋因前院功業文章足以匡時
而華國謀猷軍旅足以禦暴而捍災南贛
士民咸思慕之歌誦功德久而不替尚有
談及而泣下者本縣原有祠堂後有塞門
而主者廢爲宴憩之所是誠何心哉爲此
仰本縣官吏照牌事理限三日内查究清
理仍爲洒掃立主因舊爲新不惟合邑師
生故老得俱興瞻仰之私而凡過信豐之

墟者咸得盡展拜之禮矣

沈謐復改建王公祠于南康

南康有祠在學宮之右后異議者遷像於
旭山韓公祠內謐謁祠見二像並存一室
王公有祭無祠韓公有祠無祭室又卑陋
謐訪祠西有鄉約所前堂三間後閣一座
規模頗勝乃置先生之像于堂而韓公另
爲立祭使原有祠者因祠而舉祭原有祭
者因祭以立祠

本年三月安遠縣知縣吳卜相請建王公報功
祠聞沈謐之風而興焉者也與人爲善焉
亦可也安遠舊無祠百姓私立碑于小學
故吳申請謐與張創建焉張爲立石作記
扁其堂曰仰止門曰報功

本月瑞金縣知縣張景星請建王公報功祠沈
謐嘉獎之申請軍門張立石紀事

六月崇義縣知縣王廷耀重修王公祠于儒學
東僉事沈謐巡縣爲增其未備

九月太僕少卿呂懷巡按成守節改建陽明祠
於鄉郊山

舊祠在豐樂亭右甚湫隘茲改建紫薇泉
上矣

三十三年甲寅直隸巡按閻東寧國知府劉起
宗建水西書院祠先生

水西在涇縣大溪之西縣有上中下三寺
初時俱會各寺方丈旣諸生日衆方丈不
足以容乃築室于上寺之隙地又不足提

學黃洪昆與知府劉起宗乃議創建精舍
於上寺之右未就而巡按閩東提學趙鏗
繼至於是邑之士民好義者競來助役南
陵縣有寡婦陳氏遣其子曹廷武輸上田
八十畝有奇以廩餼來學於是書院館穀
俱備起宗禮聘錢德洪王畿間年一至水
西主會

三十四年乙卯歐陽德改建天真仰止祠

歐陽德曰擬師二詩石門蒼峽龜蹲胥海

皆上院之景今祠建山麓恐不足以安師靈於是御史胡宗憲改建于上院江西提學副使王宗沐訪得南康生祠塑師像極肖乃遣諸生迎至新祠爲有司公祭其下祠爲門人私祭則塑師燕居像而請鄒守益譏天真仰止祠記

三十五年丙辰提學御史趙鑑修建復初書院祀先生

書院在廣德州治初鄒守益謫判廣德創

建復初書院至是鐘復大修之

本年五月湖廣兵備僉事沈寵建仰止祠于崇
正書院祀先生

書院在蘄州麒麟山寵與州守谷中秀創
建之以合州之選士講授師學蘄之士大
夫最表著者顧問顧闕親兄弟也寵屬錢
德洪撰仰止祠記并請至蘄合會於立誠
堂以爲諸生開迷覺悶寵舊爲御史巡按
福建以清軍伍戎事最號有力量其子中

丁五狀元甚有奇氣亦好學惜早沒也予
不見其子見其父不見其子知其子故并
及之亦以見先生之作人者雖數百年猶
且未已也

是年巡按江西監察御史成守節重修洪都王
公仰止祠

大學士李春芳作記

陽明先生年譜後語

李贊曰。余自幼倔僵難化。不信學。不信道。不信仙釋。故見道人則惡。見僧則惡。見道學先生則尤惡。惟不得不假升斗之祿以爲養。不容不與世俗相接而已。然拜揖公堂之外。固閉戶自若也。不幸年甫四十。爲友人李逢陽徐用檢所誘告我。龍溪王先生語示我。陽明王先生書。乃知得道真人不死。實與真佛真仙同。雖倔僵不得不倣之矣。李逢陽號翰峯。

白門人徐用檢號魯源蘭溪人此兩公何如人哉世人俗眼相視安能一一中歟今可勿論卽其能委委曲曲以全活我一箇旣死之人則亦真佛真仙等矣今翰峯之仙去久矣而魯源固無恙也是春予在濟上劉晉川公署手編陽明年譜自適黃與叅見而好之卽命梓行以示同好故予因復推本而并論之耳要以見余今者果能讀先生之書果能次先生之譜皆徐李二先生力也若知陽明先

生不死。則龍溪先生不死。魯源翰峰二先生之與群公於余也。皆不死矣。譜其可以年數計邪。同是不死。同是不死真人。雖欲勿梓焉。得而勿梓。